

四庫全書

經部

欽定四庫全書

經部

周易函書別集卷十一

詳校官宗人府府丞臣寶光鼎

通政使司副使臣莫瞻菴履勘

總校官降調編修臣倉聖脉

校對官修撰臣吳錫齡

謄錄監生臣高伯揚

欽定四庫全書

周易函書別集卷十一

禮部侍郎胡煦撰

篝燈約旨

周易

聖人之道大本大用盡發泄於周易其餘諸經皆道之
散見者耳故唯周易最難理會不知從前解易者率略
而不詳何也煦於乾之一卦蓋幾一百二十頁約近五
萬字乃始解完其兩經十翼約至四五十萬字乃始解

完然止於約舉大意發明卦爻之象耳而象中所蘊尚且不能盡情發泄今節其些須遺漏者畧附於此

周易之卦文王開伏羲先天圖而闡發其義蘊者也故無有一卦一爻不是先天其說詳具下繫第六章

各卦之爻悉兼時位故諸卦皆有初有上初時之方至者也上位之無加者也至其中之二三四五則時位中淺深高卑之象耳唯方至則前此之發源者可思後此之綿歷者難量故但著初而不著其後唯無加則中下

之爻可以數紀而無加上非數可徵故但稱上而不稱數

就本末之所值而論則各有其位合衆爻之相形而論則各有其時時之與位均可紀之以數故中四爻但有二三四五之稱三百八十四爻據卦而考之無過分別時位中道理耳

凡卦爻取象無踰天道物理人事三者而已物理亦天道也其必兼天道人事而為之象者周易為天人合一

之書故也

解易者須知易之在人日用常行事事切實不可暫離而又確有明驗方為實理不問其理之切不切不計其用之驗不驗但只信口鋪揚雖道理百出皆似是之非也

易以象告者也老莊之文出於易則皆象也大易為上古之文故其立象也簡老莊為中古之文故其立象也

繁

文字之理即文而具故驟通也易象數之理緣象而伏
故遽達也難求象數者必須會其神故其達也可通於
文字拘文字者究竟泥其理故其達也罔通於象數
文字之義理有定者也故其理確不可易圖象之義理
包含無盡任人擬議而得之故常有似是之非試看文
字之始原止有伏羲四圖乃後世之六經皆出其中其
廣大可知矣

易象無所不包先儒悉準諸人事或亦文章可聞性天

道不可得聞之意歟然而易之精理少減矣

理不緣數而有數必依理而具言數而不本諸理則河
圖洛書所有之數要他何用言理而必附於數則伏羲
先天四圖效法圖書寧尚有數之可言乎蓋理則合顯
微而無間而數則有及有不及故文周擬爻之法唯中
四爻紀之以數至於初命為初以初非數之所能始也
上命為上以上非數之所能終也凡皆理之最靈最妙
處也道與器理與氣形與神莫不如是

觀圖說書僅向數中摸索則道理百千萬種不可殫究
矣夫道理而至百千萬種則理之支流而非其原本也
若原本既明則至一而無所不貫

周易立象如立於九天之上籠罩萬物雖不急急於細
微曲折而細微曲折皆所不遺與日月照臨相似故愈
推愈遠愈益難量此所以大而無外確而該也如因立
象之小而小視之又或拘泥象中人事而不知旁通非
立象之旨也如公用亨於岐山謂為祭祀之吉占則拘

象者也此非獨祭祀也睽之上九一爻也而豕也鬼也狐也絕不相類矣得其意者止一爻之旨耳

周易之占隨人所得卦爻而委曲周詳如告語焉即日月不到之區皆有體物不遺之妙則周易之至靈亦可想矣故曰與天地合其德與日月合其明與四時合其序與鬼神合其吉凶大哉易乎非至精至變至神孰能與於此乎

今之禪宗者常不正言得其意者遂以為妙悟周易立

象其道理蘊藉本可推測無窮然儒而僻者常樂於禪宗而不能精求於周易則未知立象之妙矣

周易言性之書也保合太和賦性之定也繼之者善繼此太和而已元為善長繼之而定於性中者也子思所由謂率性之謂道而孟子遂確以為性善也

時乘六龍以御天大體而大用斯存乾始美利利天下大用而大體斯在時乘六龍以御天何用之非體美利利天下何體之非用程子曰内外一如顯微無間深有

會於此也

周易之旨擬象而繪神實有函蓋萬物的氣象故不切之理皆得自附於易若高視遠寄則雖一爻之細一象之微要亦莫之罄也四子五經但能訓釋字義體貼語氣便可得解故註易之難嘗百倍於四子五經一卦而比量於六十四卦觀其異又觀其同一爻而比量於三百八十四爻觀其相得又觀其不相得緣其義理不屬文辭故註釋周易但有比例參互之一法耳

聖人寄占卜於周易非徒欲天下後世藉是以為前知之具誠謂占卜之妙悉之於幾本同太極通於神明達其微者即可緣是以為盡性達天之具如但謂周易為性天之書乃儔人之中固有不必要盡性達天不必盡解周易而事功炳若何代無之則周易當不至今日而絕矣故前知之說即聖凡不遺精粗俱到之妙也然周易常存而不廢者當即在是

四書而曰集註是大美之聚也周易而名本義恐止為

一人之書耳以初中末盡天下之時以上中下盡天下之位此大槩之說也吉凶悔吝得失憂虞撮其大槩而已而至切至當即在於此譬若君天下臨萬國但只總持大剛雖兵刑錢穀不事躬親而細微曲折要皆在總攬中矣若專在細微曲折處務欲推勘至盡是庶尹百司之事也一爻之細用以占百千萬事恐百千萬言亦不足以盡一爻之情矣特在氣機方動之初便克將大意呈露因人因事因地因時詳而味之故能前知今人

鑿鑿細求其所以然謂邵子之數實能如此匪唯不知邵子亦并不知道周易

一故神兩故化此乾坤生六子之妙也兩者乾坤也一者交也乾坤即所化之兩六子即既神之一故分六子而論莫不各具乾坤而未嘗不一即乾坤而論原可共成此一而其初固兩張子曰不有兩則無一知言哉

天地者兩之象也陰陽者兩之名也剛柔者兩之質也

動靜者兩之用也一陰一陽之謂道則神而化矣不別象質體用直以乾坤為天地以動靜為陰陽皆非也

一奇而二耦一陽而二陰三則奇耦之交陰陽之合也老子曰一生二二生三三生萬物即此旨也太極一而二儀兩幾肇於誠而幾即含誠此神化之所由寓也一者兩之神喻若夫婦之生子兩者一之化喻若一子也既肖父又肖母又如一母而育數子

三等二候所以定一卦之體陰陽太少所以致六爻之

用故周易體三而用四始終上下莫備於三陰陽太少則分位各居矣故周易三全而四備一二者陰陽也三陰陽之合四陰陽之雜也故三以立卦四以行爻

筮法三縱而四橫三經而四緯故無弗備也四營十八變雖止成一卦而六十四象亦已呈露故謂四營十八變即為先天之大圓可也聖聖相因而莫之有易神哉神哉

起知於易元之亨也效能於簡利之貞也

元而善長起知於易也貞固幹事效能於簡也

乾卦言性元之亨也坤卦言道暢於四肢發於事業利之正也乾坤二用之後唯坎卦始言時用坎也者懷胎之坤也用也者暢而發焉者也

元太極也亨陰陽也利四象也正八卦也其圖則虛其中者元也初加之兩畫亨也再加之四畫利也三加之八畫貞也

太陽者代天而行化者也故近人則極熱遠人則極寒

漸近則萬物以生近之極而萬物以長至於漸遠而又
為斂藏之候矣故易曰大明終始若使天地無日月則
終古如長夜安有生化乎此周易之所以貴陽也

日者陽光之能施者也月者陰形之能受者也故乾象
言日而坤象言月乾之大明終始言日也坤之西南得
朋言月也

雷風電雨正蒙經世書解之確矣然是四者皆氣之為
耳雲者氣之動而鬱蒸者也雨者氣之動而凝聚者也

電者氣之動而光明者也雷者氣之動而搏擊者也風者氣之動而奮迅者也雷電陽氣之舒風雲雨陰氣之聚散者也

日月星辰雲霞雨露生於天而含地之氣故各有其形山川水火草木禽魚生於地而含天之氣故各有其靈氣之凝而成形者雲霞烟霧之類是也是積之極厚者也氣之凝而成質者陰陽之氣結為雨露霜霰是也釜甑之氣凝而為水竈突之烟凝而為煤皆是也然二者

之質皆凝於水火故先天一圖風雷始之有氣而無形
水火則陰陽之氣方始成質者也故後天一圖遂以坎
離二者代先天乾坤之用蓋天地間有形有質之陰陽
皆水火之用也然積之不厚亦不可以成質故孔子於
坤初遂發積之之義

後人讀先儒之書明白顯易便以為聖道止是原其流
弊恒願讀容易解說之書究其隱衷多是厭倦心生不
肯深致其思耳烏知聖道盡在周易其中難可明言不

得已顯於圖象正如聖人之一貫難可明言不得已舉
出忠恕耳忠恕二字只在人已最親切處言其流通無
間之故若論一貫則細入至精大周無外修齊治平參
贊位育盡在其中豈一忠恕便能該括哉一貫之說學
者捫心自問猶不敢極力承當易為天人合一之道便
容易領會乎况周易之圖象原自有畫不出說不到者
乎

道合於器則器亦為道道違於器則道亦為虛

宋儒詳言學而畧言道總為性即理也一語悞之耳周子知之所以有無極之說若於性中添出氣質已非孟子性善之旨已未識中庸率性之妙亦併不解周易長善之說

周易聖人傳道之書也道率於性原於天孔子從乾之元亨利貞說起便是說性命便是賦畀之事子思天命之謂性孟子之性善便從此節出來文言說出仁義禮智添出君子說在人上便是性中之德便是秉受之事

然提出長善二字子思率性之謂道孟子性中之四端便從此出其必由乾元說到君子見天人之一致也然此兩節止說賦性之由來與性中之蘊蓄耳尚未到已發地位故下節又提君子便說出行字行字之下緊以四德係之以其出於一元之善故也中庸之率字便是此行字子思謂已發為和孟子於情字說出四端皆本孔子乾卦說來由此言之則孔子之文言固性學之宗主也後之言性學者未達易旨而性學日以偽矣宋儒

上宗孔孟然亦有到有不到處如理字之不可以言性也是從知覺後見出者也孔子雖說出善字觀後乾始美利一語則善之一字特美之云耳非能言其中之所
有也止如以大贊乾元而已及觀各正性命之下說出保合太和則所善者太和而已又不欲直以太和說入元善中以其絕無可據故寧善之而止謂為善耳此後
唯周子誠幾德說得天人合一而四德未甚分疏則未若孟子四端之驗也程子內外如一顯微無間是將大

本達道說成一貫却又遺天命一邊則未若子思之本
天為有據矣朱子虛靈不昧亦止說得秉受之性天命
一邊仍未說明張子由太虛有天之名一段分疏道理
可云盡致然以聖賢之語較之亦儘有不到處如以太
虛稱天則不如孔子以善稱元之妙也蓋善之者善其
中之所有而已此時萬物未生全無朕兆而孔子便善
其所有此豈可謂虛乎孔子明知其中所蘊大難測識
却又不能直言其所有懼人之執有而言性耳既不欲

執虛以言性又不欲執有以言性故寧善之今以太虛
為天固未悉孔子善之之旨宋儒譏佛氏薄為空宗此
一虛字與周子之無字幾何而不為空宗乎即以朱子
虛靈不昧之語較之然已少却靈字矣以氣化言天道
固佳以虛與氣合而為性則不能無弊蓋虛而不靈非
性也即令虛字中含有靈字而氣字亦必不可言性或
得與聞氣質之性之說故也然而仲舒繁露言之極詳
人之神性命於天乾元之動用也人之形體命於地坤

正之凝定也以神氣分觀之則神性也氣體也故孟子
曰氣體之充也豈充體者而可當虛靈之性乎至云合
性與知覺有心之名性體也知覺用也性靜也知覺動
也是一在存處一在發處若渾大本達道而貫之可也
合此二者以言心則不可也聖賢止言性情原未添出
心字即孟子曰仁人心也此亦直解性字耳非另有心
字尚煩註釋夫氣之不可以言性者因孔子止於乾卦
言性不於坤卦言性則性之源頭斷可識矣故言性者

必當以孔顏思孟為主

方寸之地與天同大唯其虛耳但萌些子邪妄便將與天同大之方寸全然占却不唯正理無并立之勢欲求絲路可容了不可得故聖人之學莫妙於虛太極本體固如是也要唯一無所有然後能無所不有耳

即實器而取之器之所有既盡則無復有可取者矣唯取給於虛而後能為不竭之府兩儀四象八卦及六十四卦俱生於太極則不竭之府可知

至虛莫如天地其資始資生舒斂隱見於天地間者亦曷有極耶

天地之化育無能出天地之外故河圖生成之數會於一圖而先天大圖雖具六十四象之繁要皆太極中之造化所含故止以為先天

乾見其亨不見其所以亨而藏其妙於元日見其西不見其東而藏其妙於夜月見其生不見其所以生而藏其妙於晦故復者天地之一大轉機也

五行之有旬空萬事萬物莫不由虛中起也虛而實實而虛循環不息之理也日則常盈者陽之饒也月有盈虧者陰之乏也天干每旬皆實地支每旬皆虛陰陽之義也

虛者五周而遍歷乎天干實者六周而遍歷乎地支五天之中數六地之中數也體陰用陽體陽用陰之義也五實而復歸於中者一行之周流五虛而各効其能者五行之迭運也

一無而四有者四正四維之大用四動而一靜者五十
歸中之大體也天之氣自上而下順也干之運乎支也
先甲乙次丙丁從陽而順也地之氣自下而上逆也支
之運於干也先戌亥後申酉從陰而逆也上古之五行
寓義於圖書中古之五行寄義於卦爻後世之五行乃
顯義於支干及夫支干既起而壬乙禽遁星命之說紛
然各出矣然皆推本於日月故日月者陰陽之迹太極
流動之妙機也聖人之慎動聖人之明盡人合天之道

也

十二生肖皆出於周易

周易十二支火珠林傳之如丑肖牛未肖羊之類皆自卦爻經

驗者也

陰陽但從無極中轉換陽根陰陰根陽根於無也妙於神而無者陽也滯於形而有者陰也今有窮凶極惡之人忽轉一念曰莫莫者無之謂也從前無窮惡趣盡向莫字中掃除後面無窮善機俱向莫字中根生故大易善悔而惡吝

陰陽之體各不相干陽之分無陰陰之分無陽此之充則彼之盡矣善之分無凶咎惡之分無福徵亦如芝蘭之室無臭鮑魏之室無馨也孫叔敖之埋蛇和氣之充戾氣之盡也若但以應感之理推之而歸為福報則未明於陰陽之分天人之故矣

今日必非昨日故改過遷善須日日有新機

書曰作善降之百祥作不善降之百殃此聖人打通天人故鑿鑿見其所以然故決斷其詞而莫之易也然

亦有不盡然者必偶然微細之事而非其久遠盛大者也故孔子於易便曰積善積不善然亦有善惡之形既已盛大仍不能盡如聖人所言蓋此非特一身一時之事也故曰積善積不善之家而又曰餘慶餘殃也

無首者首之潛也此流行之太極即含生之倫而各正性命者也所以有保合之太和如追遡太和之始安得竟目為有乎人之形體外具而性命則不可得而窺矣首而无也安可窺乎

統天者乾德之靜見廣大莫測之天皆其所蘊涵者也
故說入元字御天者乾德之動見化育不息之天皆其
所運量者也故說入亨字

坎惟心亨則其流也不盈也行險也皆是之故也然而
行之有尚亦惟心亨之故今觀山頂之泉下流而為川
溪萬物固被其澤然亦有限者耳惟鬱蒸之氣上行而
為雨膏斯萬物罔不被其潤所以謂行尚者為往有功
也

坎由坤來坤以形成故有兩坎之可見而謂為習坎以下坎之不殊於上坎也離由乾來乾以氣化氣與氣渾合而無間兩火相合豈有異光兩燈同室豈有異照故重離不謂為習離

人之心無時不動其動也則其發也天地之化無時不行其行也皆其動也坎之陽動於坎中故曰心亨知動處為天地之靈故復之初陽方動便曰見天地之心

周易本聖人傳道之書然未經孔子纂修以前卜筮者

傳而習之周易一書幾淪於術將不知有聖人之道矣
孔子曰易有聖人之道然後得反而歸之於經

讀周易者本無字義可訓本無文義可求但有比量卦
爻參互考究之法旁通其義例之同異而一卦一爻之
情始定故解易最難孔子聖人猶且假年學之況庸愚
乎若到得一以貫之自然通曉無滯

語道則周易為傳道之書充滿洋溢有大用矣語性則
周易為言性之書兩儀以前有切指矣語物則周易為

格物之書龍馬金玉日月風雷不一而足矣語理則周易為窮理之書剛健實大柔順虛小隨人解會矣語一氣之渾同則周易為天人合一之書元亨利貞蓋同源也語聖人之經濟則周易為參贊位育之書範圍曲成裁成輔相有妙旨矣大哉易乎非韋編三絕者烏得而知之

文字義理悉出易卦故周易為聖人所傳之道而六經皆由此出讀書不達周易則不解聖道為何旨矣

學聖人之學而不達周易皆剽切而不達聖道者也周易聖人傳心之正學也故假年以學之至於韋編三絕今人纔得翻閱一遍或竊得先儒幾句話頭便謂已明學者自思果克如此不且遠勝於韋編三絕者乎

乾象共十四句言物者三乃一曰萬物一曰品物一曰庶物何也於元則曰萬物資始蓋元在靜時渾淪涵蘊本無一物而無物不資始於此故總其全數而命之為萬萬之為言是無遺漏之說也於亨則曰品物流形蓋

此時雖尚無一物之生乃生物之機已沛然流動晃晃
漾漾而形上之理顯然昭著如可形見正如庭實陳列
一班班排列出來相似故總其燦然如可呈露者而稱
為品物流形據所見而言也至於利貞宜可言萬物矣
然天地間之生物豈數之可紀乎就令此日此時可以
數紀殆顧盼之間而所生之物又不知凡幾因其不可
以數限故稱之為庶言其衆而已矣聖人用心之細言
理之密如此豈淺嘗之士纔摸得一年半年便可妄擬

耶

上曰君子行此四德下即曰乾元亨利貞何也周易全
說天人合一之理生人之德具於性生人之性命於天
到得率性而行恐人疑與天德遠了故上曰君子而下
即曰乾所以明盡人合天之道謂德雖為君子之德而
實則成性以來秉受元亨利貞之德也行則君子之行
而實則乾之元而亨亨而利利而貞者也所由謂君子
行此四德者故曰此乾之元亨利貞者也

熟看剝夬二卦則陰陽升降之故及陽貴陰賤陽外陰
內陽上陰下陽剛陰柔陽動陰靜陽健陰順陽行陰止
陽見陰伏陽君陰民各適其分當益了然解此則卦爻
中陰陽之性情罔不判然各得其理而聖人取象之妙
亦在其中周易卦爻活潑流行與天地同運其陰之與
陽雖則有位然亦因時變遷均非一定不移者也故文
周遂取隨時變易之理而命名為易蓋自初至上卦止
六位而六位之中莫不各有時焉以考其升降參錯之

等即如剝卦本由乾來其初之變也為姤由此而遯而
否而觀以至於五乃始云剝此陰氣之上升而漸變者
也夬卦本由坤來其初之變也為復由此而臨而泰而
壯以至於五乃始云夬此陽氣之上升而漸變者也向
謂夬為夬上剝為剝上乃夬五比上夬三應上皆重言
夬夬而他爻全不言夬矣剝三與上九相應言剝宜矣
剝五比上乃有以宮人寵而不剝之象至初二與四不
應不比而爻爻言剝奚為乎全不與夬同也蓋剝之為

卦剝陽者也聖人惡陰之盛而剝陽也故逐爻皆予之以剝疑若罪陰者然謂陽應在外乃今去而使伏也至五則與上為比陰陽相得若承而奉之者然故獨不言剝知此則可知初二三四之剝止是初剝初陽二剝二陽三剝三陽四剝四陽而已非剝上也夫之為卦夫陰者也聖人喜陽之復位而夫陰也故予以決而深入之詞疑若不復使之妄逞而但俾之安分者然故初二與四皆不言夫謂其宜然而已至三則重言夫夫其一夫

則夫坐下之三陰其一夫則與妄誕之上陰相應又所
宜夫者也故重言夫也至五則又重言夫夫其一夫則
夫坐下之五陰其一夫則與妄誕之上陰相比又所宜
夫者也故重言夫也聖人用字之妙其慎重切當可知
矣觀此則初夫初陰二夫二陰與剝卦相同斷可知矣
而陽升陰降陽貴陰賤陽外陰內亦愈可知矣陰升陽
伏之卦何以名剝陽升陰伏之卦何以名夫蓋陽之德
本宜居外而顯明者也今居升陰卦中使下位五陽皆

伏是宜外者反不得外故取殺牲解體之名以為有似於剝去在外之皮膚者然故名剝也陰之德本宜居內而隱伏者也今居升陽卦中使下位五陰皆伏是宜內者今復返而納之於內故取決下而深入仍使之自安其常分者然故名夬也火珠林之有取於伏卦皆本雜卦中巽伏之義及巽卦中先庚後庚均取伏羲而來觀此則陰陽內外現伏之辨可知矣升陽之卦至於五雖與上比却係夬夬之詞以明有夬陰之義固矣三遠而

與上應亦係夬夬之詞而欲其夬陰故上六之象遂有
无號之詞若然則剝之三五亦宜乎其剝上矣乃剝三
雖有剝之之係亦止與以足以辨以膚者相同止剝本
爻在下之伏陽其與上九陰陽相資如故也故上九亦
有碩果不食之象剝至於五偏有魚貫以宮人寵之象
若卑牧而承奉者然何陰陽之上升同也而剝之不剝
夬之重夬若是其懸殊也此無他故陽性善動其德上
升健行而不止況有妄誕之陰本不宜上乃今恣靜於

其上故夫之上六必將不能以久存陰性靜柔其德下
順得中位而據之已安況有上陽可順之以圖安故剝
之上九得久存不食之碩果此則動靜健順行止不同
之故也至於剝五夫上皆屬陰爻乃一係為後宮一係
為王庭其故何也曰此又陽外陰內陽君陰民之故也
蓋五爻之為君位也諸卦類然而上爻之亦稱君位為
五爻皆在其下更無有尊於此爻者故明夷之上六遂
取象於紂今夫之一卦羣陽在下一陰獨居其上本非

君德安處尊位故不以為君而止以為王之庭若剝之
五爻本為君位而陰實居之五又在中之爻陰爻居君
位而在中故直取象於后在外則象庭在中則象宮此
又陽君陰民五爻居中而上爻居外之象周易之妙非
韋編三絕者那克推勘細密若此觀此則聖人之取象
皆必有其道矣後人之聰明萬萬不及宣聖又不克如
韋編三絕之勤劬宜乎學易者之難其人也

太極猶心也陰陽好惡也其所生之萬物行著之事體

也太極性也陰陽喜怒哀樂也其所生之萬物則五音六律也

不知保合太和是言天命之謂性則不知元者善之長也止是繼善若知繼善只是保合之太和則發而中節之和有由來矣不言萬物而言萬國蓋此止是方生之始又乾必交坤故但指萬國而言其地耳

據太極論陰陽則陰陽為動用方形之始故曰形而上形而下據萬物論陰陽則陰陽為化育之所自來故曰

立天之道曰陰與陽動靜二者已在陰陽一邊是太極之所生謂太極為靜體非也太極不可言靜也太極者至精至微深妙莫測其蓄難量其出不窮者也

天心之說是從震動之初說向未動以前此時可以明燭而不可以動言故復初有天心之見天根之說是從震動之後說出不息之動此時全在動邊而明無所用故曰三十六宮都是春先天圖圓形也所以象陰陽未肇渾淪周匝圓轉不息之旨後人配其方而論之則未

達先天之旨後天圖方形也雖由先天圓圖而出可配
圓圖分說道理然却在既用以後其體已定故有四正
四隅之象

統天見元之大御天見元之亨

太和即御天之六龍六龍即乾元之亨所由曰天命之
謂性也不解此則性善無根

無極之說如何不足以言道蓋緣太極中原不是无若
果無矣如許大之天地如許多之萬物何由能生觀孔

子贊乾元與子思言性可知矣孔子知文王之元便是
太極原不可以言說故但就一元既亨所生之萬物仰
而証之以為此乃萬物始生之基故曰資始是雖未說
元字而資之一言已明指說由來之地子思之中本是
說性此便是在人之元然究不得實証其中之所有即
其中之已發者回而証之謂為喜怒哀樂未發時原在
此中而已亦是即已發之可名者回証夫未發之所由
然乃既能發出喜怒哀樂則其中之所蘊已大難量豈

可以無字言乎聖人之卦爻取驗於歲時日月是即天
運之流行呈露於卦爻中原無定位原無停機故曰與
天地合其德與日月合其明至人事之吉凶禍福悔吝
憂虞取正於卦爻而罔有不驗則是生人之動靜行止
皆天道之默運而幹旋者也故曰見乎蓍龜動乎四體
要唯慎動者可以趨吉避凶如徒以粗淺技藝目之何
由解達天之妙

伏羲之圖象也折而為卦亦象也文王之卦詞周公之

又詞皆據象而擬之者也乃象之所包千變萬化雖有定理實無一成確乎不可易之定論原非意計推測故愚人之渺見苟與卦象無違皆易理之所必取即有似是者亦不能確指其非而擯棄之唯聖人傳易傳道之心實能見到源頭然後明無不燭而真贗始有定形是非始有定論故牛之一毛未始非牛海之一勺未始非海果得大智見其源頭有以灼然於形神光彩之外而前此之各持一說均謂之為非亦可

今人動言理學顧聖人之理著於六經窮理莫先於窮經經旨不明而動言理學予誠不知所窮者何理六經之理莫深於周易莫精於周易此豈窮得幾分便可自謂足乎

凡看卦爻須知主象如乾以天為象坤以地為象坎以水為象離以火為象又如潛龍為乾初之主象飛龍為乾五之主象好遯為遯四之主象是也其下接言天道或接言人事皆本主象以立言如不接言天道接言人

事則人事之義即在主象中又有一卦一爻而三象兩象者如睽之上九止一吉字屬人事是也又有卦辭與人事雖若不同而道理則一孔子卦辭必連舉之如損象是也

聖人之設立互卦欲使人知流行之氣上下貫通不可截然分看故卦之三爻多連四爻以為言卦之四爻多連三爻以為言今人著述多割裂古人補綴成帙成家言其有古散而我聚前後一義功當不在古人下也

又有分類命意首尾貫通猶能不失本義不則渙矣散
矣襲而已矣取重於他人而自以為名陋矣總不若心
解神會實有心得既不失之勦襲又不失之支離為真
得也然有於古人書偶焉旁觸自作意見以矜竒炫世
自云心得如不察其似是之非遺誤後人實甚周易中
有明明皆知其誤乃不能實証其非者詎不為周易之
蠹乎煦之學易特鑑此弊凡古人所已言已明者槩不
襲取其有實知其誤而心解神會者亦必取証於經傳

援之以定一是非經非傳之旨必不敢以取証即有經傳未之言者亦必因經傳而推出者也張子正蒙止是用九一節說得真用九無他止是元之亨元之亨無他止是太極之動

其陽白陰黑則陽明陰暗之義其陽虛陰實則神清形濁之義乾以虛為體以實為用既用於坤則實矣故以為動直坤以實為體以虛為用既用於乾則虛矣故以為動闢

細讀乾坤兩卦則知乾施坤受乾直坤闢乾健坤順乾
始坤終乾神坤形之理細讀復姤兩卦則知陽善陰惡
陽大陰小陽君子陰小人之理細讀剝夬兩卦則知陽
外陰內陽剛陰柔陽行陰止陽君陰民陽上陰下當其
位則安不當其位則危之理細讀蠱巽兩卦則知陽有
陰無陽始陰終卦中之氣流行不已之旨細讀隨臨復
比四卦則知卦氣自下而升逐爻漸進之旨細讀晉夷
二卦則知陽明陰暗之理細讀小過一卦而知過遇不

同之故則知九六二用必有卦主而陰陽相應相比及卦氣自下而上升之理細讀言遇言隣之爻而並察其動爻變爻互爻必會先天圖中比肩之卦又細讀言婚媾之爻而察其動爻變爻互爻必會先天圖中對待之卦則知周易之六十四卦莫非先天之八卦矣解此則陰陽之大本陰陽之作用並其體段形色皆能實指其所由然則陰陽爻之在卦中與時之宜不宜與位之當不當當自明晰其於周易思過半矣

春秋

春秋上列天時下詳人事明天人之致一標感應之微
機也著防微杜漸之旨謹始也謹始者當天人交關之
際明轉移變化之權是參贊位育之所自起聖學之極
精極微者也

聖人之作春秋天與人間書之觀春王正月四字可知
矣故以為天人合一之書

春秋上列天時下詳人事原均賦之田則人與天同本

明欽若之分則人與天同德決感應之靈機明人與天非殊絕也如但以為考時徵事之具則仍然魯國史耳何為聖人之經

四詩

四詩首風明習也次小雅明治也次大雅明教也終之以頌見治化之成也舊染之化因人轉移故風首文王之化而繼以小雅明風俗轉移由政治之得失小雅列朝會之詩政事之所從出也君子德風小人德草移風

易俗端本在是矣廟也者敦本睦親之所自始風行天下曰觀盥而不薦有孚顒若化可知矣故謂為神道設教裁成輔相範圍曲成聖化之成也故功歸於頌

周易為文字義理所從出詩之比興即象外之旨也離騷學詩之比興者也漢魏之詩又擬騷者也唐宋之擬古擬漢而已然能此者李杜之外亦無多人唯意在言外者可以萬世不敝

書經

虞書第一篇諸務未詳首列天時下詳人事敬天勤民之義明天人之致一也

典謨訓誥雖止於紀事紀言而厥有恒性與作善降祥之語皆聖人垂教之深意也

洪範一篇是言道理不是言數其中天人合一之秘原與周易同義故聖人重之乃不知者徒於數上究心非其旨矣觀其本文曾未沾著洛書絲毫如止因自一至九之數與洛書相同遂以為則倣洛書然則洪範所重

止此九數而已而九數之下所列五行皇極諸論皆聖人之贅辭矣甚哉徵數而不徵理此後儒之大弊也

禮記

禮者國之四維三禮聖人經國之大本也春秋之序次先天而後人先王人而後列國先大國而後小國先卿貳而後大夫皆禮意也國語持論多準禮以為衡執玉高卑不獨觀其敬肆且可驗其存亡矣禮之於人大矣哉

儀禮詳於器數大小戴分釋其義而萬物本天人本乎
祖皆天人相關之的旨誰云五經各一其義

六經總義

六經四子之書皆聖道之散見而周易其大本也六經
四子書由整處說到散處是一本而萬殊者也故必詳
細分疏然後可以牖庸愚之知見周易由散處說歸整
處是萬殊而一本者也故必合萬有不齊歸於至一然
後可以極盛德之高深

六經之文雖不同體以理為主耳理不足斯以其文勝之諸子得專家莫不如是然文之茂理之塞矣

辨誤

左傳晉納周王筮得大有之睽其文曰大有去睽而復杜氏作一句讀非也此三字句也大有去兼變卦而言正卦也睽而復兼正卦而言變卦也大有去言周王之始棄天下而外出睽而復言周王即今既睽而復入也其始棄四海之有而去之去斯睽矣其終既睽而復於

其位復斯合仍大有矣睽本乖離之卦而卦辭爻辭多兼言合蓋此義也此大有與睽相交互見之旨也若作一句讀便不達卦爻之理

左傳南蒯之叛也枚筮之枚筮者不以蓍筮而以子筮也凡物之有數可稽者皆可用以筮凡物之克具四象者皆可用以卜故筮法創於聖人以二分之以四揲之以三備之費如許經營始成一卦銅錢始於漢末其背面兩分是陰陽之象也重交單拆亦四象也重三而六

又斯備與筮法相合故今用以卜無不驗也苟知此矣則善筮者寧必拘著草乎哉

三百篇唯比興為妙比興始於易象離騷學詩之比興者也詩家推尊工部秋興八首則杜子之離騷也其中或喻世亂或喻君不得所或喻用非其人或喻已之不可復見用或喻為時之既暮皆詩之比興體也而從來註釋家但目為秋興則未達其旨矣

工部集中最深最曲最妙最精者無若香稻啄餘鸚鵡

粒二句自來但作境話會是以均未得解亦并未有專註須知讀古人之書皆當論世孔子之春秋定哀多微詞蓋必有難於顯言者矣下繫第六章非由論世固莫可得而解也工部世值亂離而居位食祿者率皆無益於國家已雖有撥亂之志乃因家屬避亂遷居於蜀幸獲生還遂毅然致仕而歸其後困抑無聊又見時事日非朝無撥亂之人已無復用之日撫時自思覺為時之將暮是以有秋興八首香稻句喻食祿之非其人也碧

梧句喻固位之非其人也蓋香稻非泛然養物者也今
香稻已啄餘矣亦知其為鸚鵡之粒乎觀啄餘之下用
鸚鵡粒一擺然後知啄餘香稻者非鸚鵡是本不應啄
而今竟啄而餘也今碧梧已棲老矣亦知其為鳳凰之
枝乎觀棲老之下用鳳凰枝一擺然後知棲老碧梧者
非鳳凰是本不應棲而今竟棲而老也啄餘喻食祿之
豐棲老喻固位之久在朝所用既非其人乃已之貧而
無位實能有為皆在言外此等字法句法精深曲折又

極顯亮工部集中當為第一等妙文那得輕易放過

杜子美花萼夾城通御氣芙蓉小苑入邊愁謹按宋趙
彥衛御塞行程後附長安建都城以地高不便隔在郭
外為芙蓉園引水灌之號曲江明皇增築興慶宮夾城
直至芙蓉園則杜詩二語皆指長安也

每依北斗望京華後人改為南斗誤矣蓋身處川蜀而
日望長安必不能確知其所在故必依星辰而定之則
或左或右猶可以意會也若改作南斗不過謂身之所

在而已然南斗在上而身實處下豈身之所能依乎况
北斗原有定處而南斗則東西隱現四時不同既為秋
興則南斗當在極西亦必非身之所能依也此等訛誤
皆宜正之

周易函書別集卷十一

欽定四庫全書

周易函書別集卷十二

禮部侍郎胡煦撰

篝燈約旨

諸賢

吳氏曰閔子之在聖門孝儼於曾德行亞於淵即處從
母一節真誠愷摯至性流行辭費宰諷長府言和意果
彷彿聖人氣象世儒往往高談性命薄前賢不足道而
跡其居恒措履反不如庸衆人之為者多矣是以君子

金剛經卷第十二
貴實行也

朱子曰聖人之道大段用敏悟曉得的多方擔荷得去
聖門自顏曾而下使用著子貢

又曰夫子之於子貢屢有以發之而他人不預焉則顏
曾以下諸子所學之淺深又可見矣

諸子

古人之不可及者皆必各成一德孔子門人莫不有然
又如宋之諸子皆亦各有不可及者周子開宋儒之先

豈所能及張子之篤行力學豈所能及張子之穎慧豈所能及邵子之好學篤信安貧樂道豈所能及朱子峙於其後獨集諸儒之學而傳之俾後世知孔孟之可學此則朱子所獨擅者也

儒與賢較然各別而人不之察也今試看先賢之在聖門得聖人而師之莫不靜專淵穆循序漸進各有所成至於諸儒其閩洛各成一是固不相假矣後之學程朱者唯許衡薛文清王陽明三公猶較然不同然必以窮

經為主各有心得乃佳徒言曷貴乎

周子

孔子係易曰易有太極是生兩儀兩儀生四象四象生八卦始有太極之名極也者極至而無以加也太也者尊上之也因兩儀既形推出所由以生之之故其中包含蘊藉有無混合可想而不可知乃始以太極二字贊之亦如乾象之釋乾元止以大哉二字贊之即欲實指其中之妙不過曰萬物資始而已而其中之妙不可言

也子思於未發之中說出喜怒哀樂即是此等之法後人不知太極二字止是贊詞而或有或無各競一解矣然欲直謂為無也而兩儀四象實由此生欲直謂為有也乃當兩儀未生之時又實不知其所由以生故凡學周易窮道理不若止存太極二字不必別置一解猶不失孔子係易之實理也

太極之說自孔子發之秦漢以後杳不得其解矣周子得於希夷而後之儒者始知有太極之說周子之功偉

矣然其理之不可思議不可言說者止太極二字盡之
此固不待有圖之可傳乃始足發孔子之蘊矣然周子
之圖則佳而其說則未盡善也夫圖之上一圈在周子
以無極當之而其實則太極之妙有無混合不可言說
者也其下陰陽劈分左右則兩儀之象也其陰中有陽
陽中有陰則陰陽兩不相離互根之義也其下所列五
行則四象也四象之下宜列八卦然八卦之成不過男
女之異體耳今以成男成女二象當之故可以當八卦

之成也至加無極二字於太極之上則未為全美矣夫太極固非有無之可得言也朱陸二子競競辨之而人終莫知其是非之誰屬是太極之傳雖有其人而太極之實恐未有定論也不如止存孔子之說不必索之於圖猶可存太極之真也

周子立圖之妙全在無極二字然此二字亦只說得流行中之太極指循環一邊說則可矣若敦化之太極為生天生地之大源頭豈可言無若源頭果無則如許大

之天地如許多之萬物何能生成出來便在循環之中
即此無字亦未盡確切今試捫心自問有乎無乎今有
纔搜求到源頭一邊說著無字者便指為空宗便目為
禪教矣孔子乾象曰萬物資始所資者何事有乎無乎
中庸之言中也曰喜怒哀樂之未發在中者何事有乎
無乎甚矣後人之自蔽也

無極之說宋儒論之極詳要惟陸子之言為當詳具朱
陸異同辨後

孟子之性善只是乾元二字認得確周子之誠幾德只是性善二字說得精總是率性之謂道一句見得明耳獨於幾中分言善惡竊懼其未盡然也乾象言天命之謂性便曰保合太和曾有些子戾氣可言乎總由認幾字為兩岐之名遂至貽誤後人說成氣質之性此不可不亟正者也

幾非兩岐之名也易曰幾者動之微吉之先見者也此微字即中庸莫顯乎微之微然止單說吉字一邊則人

性之本善亦可見矣漢儒添出凶字則未達聖人之旨
矣

周子之誠幾德即周子圖中之旨也誠極也幾兩儀也
德五行也比諸周易即太極生兩儀兩儀生四象之說
自漢以來淹沒已久而周子揭之俾後之學者得以窺
太極之精微探周易之大本周子擔當斯道其力偉矣
獨惜於八卦及六十四卦未能盡情標發出來猶不能
無缺略不全之憾

陽變陰合變合字最精變言其陽之動合者合焉而已
明陰之無為而順受也變者神用合者形用也

動靜者陰陽之義兩儀之事也兩儀者太極之所生也
太極一動便分兩儀故曰太極生兩儀非先生陽而後
生陰也必待陽之動極乃始生陰則陰為陽之所生非
太極之所生矣即以動極之極認為太極則是太極便
具動靜兩體不得為太極矣故周子所云止是流行之
太極非敦化之太極也

周子太極之上忽添無極何也曰此中原不是無只是安放不下一箇有字中庸曰喜怒哀樂之未發謂之中既曰未發便是未嘗有而仍添喜怒哀樂四字於上則是此中之涵蘊無所不有所以曰無極而太極然止目之為中則是但指其所在之位而証之至其中所蘊仍不可得而言所以謂為無極也

天命之謂性此性字便是無極率性之謂道此性字便是太極天是一元敦化之太極性是流行在人之太極

誠通誠復即子思率性之謂道也

誠精故明此明字即曾子明德之明即子思誠明之明
然先儒講學者多解此明字者絕少孟子之良知周易
見天地之心皆此明也姚江標良知之說而又取陽明
以為之號豈無見者乎今試思愚夫愚婦雖甚暗昧苟
一解說皆可洞曉非此心自然之明原有中存者在烏
乎能然天下最難明之事非心上見得極確能行之無
誤乎夫此見得極確非此心之明乎未窺其際者猶嘖

嘖焉排駁陽明良知之說甚矣可與共學者多可與適道者難也

周子最有見地唯誠神幾三字其無極圖便從此三字出來然細玩之仍與無極之說相似孔子乾元之利貞說太和矣於人心之一元說善長矣孟子於性中說善矣子思於性中說天說發而中節矣此之所謂誠者即周子之言性也乃固謂誠為無為彼能亨之妙伊誰氏之為乎兩儀非太極之生乎抑別有為之者出於其間

乎當知孔孟之所謂善子思之所謂天皆是說性中之
蘊大難量耳其蘊之大難量者皆因後此之作用大難
量也今曰無為豈有終古寂靜不發不率之時乎不且
為釋氏之頑空寂滅乎故知無為二字與善字天字之
旨未合

周子曰幾善惡孔子曰幾者動之微吉之先見者也夫
既曰動便是說亨邊之事豈有從太和繼善而來從長
人之元善亨嘉而出顧猶有惡之可言乎有惡猶得為

嘉之會乎猶得有義之和乎此與善惡渾之說孰得而孰失乎故知周子幾字之說亦未甚當孔子之言幾也只言其方動耳乃於動字之下便繼之曰吉之先見言吉而不言凶是即性善之旨子思孟子皆於此處得力所以為孔子一脉之傳漢儒不知此旨吉字下添出凶字以致後儒并將善惡二字解說幾字遊其門者據誠無為幾善惡之說又分說義理之性氣質之性傳授不確貽誤後世不少恐聖人之本文不可一字增損也學

者細心味之當自了然太極動而生陽既曰太極動則
是以太極為靜體也既曰動而生陽則是以太極為陰
質矣觀下文靜極復動之說可知矣夫動靜皆兩儀之
事動靜幾也陰陽幾也陰陽與太極原有所分太極敦
化者也幾者太極所生方亨之作用也故曰動之微今
止曰動而生陽靜而生陰不曰動而生陽動而生陰則
未知幾之所以為幾也夫幾者動之微也動然後有生
靜則烏能有生乎今日靜陰為太極宜乎以无為稱也

夫太極者渾渾淪淪活潑潑地其出不窮其生不已者也而要其為體則莫不可知不可思議不可言說故孔子於乾之一元但曰萬物資始而已其所生者則兩儀也所以謂之為幾非止動陽之一儀也今必待動而既靜然後生陰則已在流行一邊非敦化一邊之太極也夫乾元者周易之太極也孔子釋之一曰資始一曰善長矣何嘗有靜陰之目乎靜矣而萬物復何資乎

周子於幾中兼說善惡是明知幾為兩岐之名也及其

說太極之動却又單說一箇陽字夫動非幾乎何前謂為兩而此謂為一乎

一動一靜互為其根陰陽者二儀之體也動靜者二儀之用也陰陽實而動靜虛動靜因陰陽而有者也其在周易凡卦爻之陰陽皆有動靜謂陰陽互根可矣謂動靜互根能乎比之中庸靜則未發之候動則已發之候也謂未發為已發之根猶可謂已發為未發之根則已發之為言已在闢而散之之列矣藉令既已發矣猶可

以返而為未發也則既亨以後仍可返而歸元矣安得有各正之性命貞固之事幹哉

前以陰陽動靜俱生於太極而此又以靜為未發動為已發豈不與靜極復動動極復靜之說同乎不知周子之言動靜配陰陽而言是說太極以下事此言動靜只人身之動靜耳陰陽二者皆有之既以畀賦於人便在流行之太極一邊故動靜不必同時若方從太極而出有陽便有陰有動便有靜陰也者由陽而形出者也靜

也者由動而形出者也

前曰幾善惡後曰剛善剛惡柔善柔惡何自相戾也既以無為為性則幾乃性之所發據孟子性善之說而較之必有一差周子本意亦知幾中本不可以言惡故特於後文舉出剛柔以代幾字然後於剛柔說出善惡以實前文幾善惡之義不知剛柔已在氣質一邊是陰陽成形之事非太極初亨利上之道也程子氣質之性便從此剛柔二字看出者也無為者太極也幾也者太極

之動也此時安得有質而可以剛柔言乎剛柔既不可
言安有善惡如謂剛柔見而始有善惡則已成四象而
不得謂之幾如謂幾中便有善惡則又不得謂為剛柔
皆有善惡且與孟子子思大悖如謂剛柔便是善惡則
又不得謂剛善剛惡柔善柔惡後之學者還當以孔孟
為正其在周易曰幾者動之微吉之先見者也言吉而
不言凶則惡之不可以言幾明矣

今曰幾非兩岐之名然則孔子所謂太極生陰陽者非

乎如以陰陽必生於太極為一時同生者乎為異時各
生者乎曰一氣而自具陰陽之理耳張子曰一物兩體
是也今即一物觀之未有不陰陽之兩具者也植物如
草木其可見者形也而漸長漸大者氣也是形氣之合
一未有能分者也動物如人其四肢百骸形也而情性
之具於中者神也是形神之合一未有能分者也又如
一物有上則必有下有內則必有外皆陰陽也蓋此一
氣出於太極全是太和則至柔者也而其充塞天地曾

無一毫阻滯則至剛矣文王之釋乾坤以此為利孔子之文言便以為利者義之和和便是至柔之義和出於利利如利刃便是至剛之義利而和和而利此剛柔之合一而不分者也龍戰於野便是柔而剛亢龍有悔便是剛而柔未有能分者也周子謂靜極而動動極而靜此皆說在流行之際非敦化之時也若敦化之太極則一理而動靜具矣噫難言矣

動而無動靜而無靜此則其見解最密處

周子之誠言性也其善惡言幾也謂性中有惡恐與告子湍水揚子善惡混之說同見若謂性中止有剛柔剛柔始分善惡則剛柔善惡便是陰陽之上復加陰陽便成四象又不得謂之為幾總緣將幾字認作兩岐之名故誤耳不知幾字雖具有兩儀不可直以幾字便認作兩儀孔子之言曰幾者動之微此正乾之亨坤之亨處尚未屬在事上尚未有形質可言安得有善惡可分哉其在人則發而中節之發字是也其下曰吉之先見者

也不曰吉凶之先見者也此便是性善的確實妙義子思親承孔子之教所以曰發而中節謂之和夫人情之發不能中節亦已多矣乃不曰發而不中節者以其率之於性由太和長善之理而出故也率之於性而即謂為中節者性善故也此便是孔子於幾之初動言吉不言凶之旨孟子私淑諸人所以直謂為性善其原皆由孔子乾象及文言而出乾象言性之賦於天者即天命之謂性也至於利貞其性已賦則曰各正性命保合

太和夫既謂為太和曾有此子戾氣乎曾有惡之可得
言乎如有此子戾氣則必有阻塞不通者安得有各正
之性命乎其文言言性之命於人者即率性之謂道也
開口便曰元者善之長也曾有惡之可得言乎蓋人所
秉之性全由保合之太和而出全是一片蘊藉之生機
故下曰嘉之會嘉美也亦即善也下又曰利者義之和
和即太和之和子思中節之和即由此兩和字而出以
其胸中全是太和雖未到成事之時而立事之幹全在

於此故曰繼之者善也成之者性也子思直謂為中節
直謂為和而孟子亦遂直謂為性善也今以子思之語
証以常人之日用喜樂和氣也哀怒戾氣也然哀痛之
事或數歲不一見矣如作哀矜之哀則又惻怛之心仁
慈之本太和之發也怒為戾氣雖極暴厲人未必日日
有之而喜樂二者則因景因事隨時可見由此言之則
和氣之中存而性之無有不善概可知矣孟子之乍見
孺子赤子知愛皆不必聖賢自然而然者也今觀人與

人甫一相接皆各有藹然相合之情未有甫與人接便
詬詈不已者也是皆和氣之充也和也者善之繼性之
成也後人未達象與文言之旨又欲牽扯周易以釋天
性故將幾字兼說善惡竟與告子苟揚同為異見乃程
朱宗之亦遂兼說氣質之性夫性何事也而可以氣質
言乎不知幾字只是性之方動率之則有善而無惡不
率則必為襲取盡成惡趣矣是外感也非性也此解自
具於顏淵問仁章及孟子乃若其情章今欲明性字實

義不盡去從前之異解不恪遵孔子子思孟子之言則性命之學難言矣

周子無極圖實本於先天八卦蓋周子之無極即八卦圖之虛中其左似坎右似離即先天之左陽右陰特陽中有陰陰中有陽以寓根陰根陽之義此周子之心得知陰陽兩不相離又有相須互用之妙觀他下變合二字便是乾重元亨坤重利貞之理然四象已在其中故下遂列以五行要當知周子所授斷有種穆之傳至無

極圖則周子之另作者何也伏羲之先天非取則於河洛者乎無河洛有先天乎誰謂周子無所做乎

朱子曰周子所謂無極而太極只是說無形而有理太極是五行陰陽之理皆有不是空底物事照按既云太

極是陰陽五行之理皆有至與陸子論辨如何又偏主無極當知周子全是說流行之太極必如易中方是說敦化之太極然太極必竟非圖可畫所以周子特添出無極一圖來及細玩周子之無極便在太極圖中正是

伏羲先天八卦耳止就其圖說又與所畫之八卦圖絕不相合為其所說陰陽動靜是相連而生與周易太極生兩儀之說總不相合何也陰陽同生於太極是一生俱生者也

問孟子乃若其情則可以為善而周子有五性感動而善惡分以善惡於動處並言不同如何朱子曰情未必皆善然本則可以為善而不可以為惡惟反其情故為惡孟子言其正周子則兼其正與反者而言也照按此

論總與孟子性善之說不合故與周易相違孟子則深知周易者也言性者當分別內外須知那件是本來的
那件非本來有的然後知孟子立言之意然後能合周易之旨蓋周易一書全言性情不實能洞明周易其違
孟而信周者宜也

問心本是箇動物不審未發之前全是寂然靜還是靜
中有動意朱子曰不是靜中有動意周子謂靜無而動
有不是無以其未形而謂之無非因動而後有以其可

見而謂之有耳方其靜時動之理只在伊川謂當中時耳無聞目無見但見聞之理在始得及至動時又是這靜底耳照按此段極粹

又曰周子論幾字如復之初九幾善也姤之初六幾惡也照按復姤皆象人身中事非天地也姤破乾體而成巽是由渾然至善中而生此惡幾誠惡乎其後之長也復破坤體而成震是由端然靜正中而動此善機正喜其元善之動而來若太極初生之陰陽仍當於乾坤二

卦求之斷不可曰陽善而陰惡

又曰幾字自周子發明尤親切耳照按周子之幾善惡只是誤信漢儒吉之先見一語添出凶字總由未知性善二字耳予已辨正於繫辭註中

羅整菴曰通書四十章義精詞確至於五殊二實一實萬分數語反覆推明造化之妙本末兼盡然語意渾然即氣即理絕無罅縫深有合乎易傳乾道變化各正性命之旨矣照按既知一實則不可止言二實然以二說

實固亦無不可者乃既以為一實矣而又加無極於太極之上非自言而自背乎

又曰周子誠上章誠即太極也大哉乾元萬物資始誠之源也即陽動也乾道變化各正性命誠斯立焉即陰靜也純粹至善者即太極之理有善而無惡也故曰一陰一陽之謂道陰陽即動靜也道即太極也繼之者善即誠之源也成之者性即誠斯立焉元亨誠之通利貞誠之復即太極靜而陰也大哉易也其性命之源乎易

即陰陽互根動靜循環而性命之源即陰陽動靜之理
太極是也圖與書相表裏如此照按道即太極也是看
道作所以然之說既知為誠之源便在大本一邊如何
說得陽之動各正性命上本乾道變化來如何說得陰
之靜又曰陰陽即動靜也便已是太極之發用如何又
曰道即太極也反說回大本裏面去了觀一陰一陽之
謂止說陰陽即是道耳如何將陰陽說在用邊道字又
說在體邊至於幾善惡則未明吉之先見一語聖人止

言吉而不言凶必有故也蓋水之清濁必有本源未有
源頭既清逮其流出尚雜些湏泥滓者也可惜後學止
向宋儒口頭一句半句搜求道理絕不向孔子周易破
費死工夫恐終不免趨易避難之弊

邵子

邵子於天地間所有悉分為四是即陰陽太少之推也
伏羲以之畫卦揲著以之命爻舉不能外而況其他乎
要其大旨亦只陰陽二者之交耳故言易者不可不知

交字之妙

宋儒於周易極精極深無若邵子至其來往之義恐未盡當故今後人指為卦變亦偶踈者也夫來則太極生兩儀之事往則内外卦分界之旨也來謂源頭往謂由此而前進也周易象傳確有明証邵子謂往謂往日來謂將來較諸先天圖止可以言陽而不可以言陰是得半之說也詳見原卦來往條内及卦變下

其釋方圖本于孔子之說卦然亦未盡方圖及孔子之

妙夫方圖者天地既交將已有質故方之以明其靜也
又納之於圓圖之中其妙則以氣用者在中以形用者
在外是即形之既成虛靈居中而肢體外衛之象也論
形則天外而地內論理則形外而神內此即天地既交
之象也以爻而論得初爻者在中得中爻者在外得末爻
者又在其外而乾之與坤乃渾淪包之於外明天地間
成形成性者即天地所生之萬物也

天根月窟創見於邵子釋先天八卦一圖深達陰陽始

終之妙詳見首卷原圖

道為天地之本天地為萬物之本此即乾象統天之說而子思語大莫載語小莫破亦是此旨

邵子擇語 孔子贊易自義軒而下序書自堯舜而下刪詩自文武而下修春秋自桓文而下

乾坤縱而六子橫易之本也是言先天圖震兌橫而六卦縱易之用也是言後天圖然後天即先天之既交也
照有二方圖皆為先天而設

得天氣者動得地氣者靜 木之枝幹土石之所成所以不易花葉水火之所成故變而易也 圖雖無文吾終日言而未嘗離乎是氣者神之宅也體者氣之宅也 煦按神象太極氣象陰陽體象形氣也 水者火之地火者水之氣黑者白之地寒者暑之地 草伏之獸毛如草之莖林棲之鳥羽如林之葉煦曰水游之物鱗如波濤之文 天地之氣運北而南則治南而北則亂 在水者不暝在風者暝走之類上睽接下飛之類下睽

接上 飛之走雞鳧之類走之飛龍馬之屬 鷹鷂之類食生物陽也而雞鳧之類不專食生陽中之陰也又虎豹食生物剛也而猫犬之類食生又食穀剛中之柔也

凡人之善惡形於言發於行人始得而知之但萌諸心發於慮鬼神已得而知之煦曰靈機觸響而動天之聽也虛機條覺而明天之視也

人之神則天地之神人之自欺所以欺天地

易有實數三而已參天者三三而九兩地者倍三而六
學不至於樂不可謂之學 海潮地之喘息也所以應

月者從其類也

照

曰月與地同德見附論日月中

植物體

縱動物體橫

照

曰人宜橫而縱是動植之兼體也故最靈於

萬物

動物自首生植物自根生自首生者命在首自根生

者命在根

起震終艮一節明文王八卦也天地定位一節

明伏羲八卦也

有溫泉而無寒火陰能從陽陽不能從陰

也

照曰陽能入陰陰不能入陽也

天下之事始過於重猶

卒於輕始過於厚猶卒於薄況始以輕始以薄乎天
何依曰依乎地地何附曰附乎天天地何依何附曰自
相依附 天依形地附氣

朱子曰周子從理處看邵子從數處看都只是這理照
按數而無理安得有數唯非理而誤認為理乃真無理
者也若孔子之易正是因卦因爻而論斯理在其中數
亦在其中矣偏於數者猶且不能遺理恐偏於理者將
必有易外之理故邵子必不可忽邵康節先生知慮過

人遇事能前知程叔子嘗曰其心虛明自能知先生於凡物聲氣之所感觸輒以其動而推其變焉於是撫世事之已然者皆以先生之言先之照按此方可與言數學者近時亦有數學善藏其用者使人敬之予嘗叩其實得却無他奇

程子

大程夫子云聖人用意深處全在繫辭詩書乃皆格言觀易須識時然後見逐爻之間嘗包涵數義聖人嘗取

其重者為之辭先生此言真知易者

河南劉氏曰大程夫子達於從政以仁愛為本某嘗問先生以臨民曰使民各得輸其情問御史曰正己以格物

河南朱氏曰先生之學以誠為本蓋誠者天德也先生得聖人之誠者也才周萬物而不自以為高學際三代而不自以為足行貫神明而不自以為異識照古今而不自以為得

藍田呂氏曰先生其自任之重也寧學聖人而不至不欲以一善成名寧以一物不被澤為已病不欲以一時之利為功其自信之篤也吾志可行不苟潔其去就吾義所安雖小官有所不屑

問定性書云大率患在於自私而用智自私則不能以有為為應迹用智則不能以明覺為自然朱子曰君子之學莫若擴然而大公物來而順應自後許多說話都只是此二句意良其背不獲其身行其庭不見其人此

是說擴然而大公孟子曰所惡於智者為其鑿也此是說物來而順應第能於怒時遽忘其怒是應擴然而大公而觀物之是非是應物來而順應照按明道答橫渠定性書是二十二三時所作大公即西銘所言也順應即中庸率性之率字

又曰橫渠有意於絕外物而定其內明道以為須是內外合一動亦定靜亦定而應物之際自然不累於物苟只靜時能定則動時恐被物誘去矣

問明道云內外兩忘是內不自私外應不繫否朱子曰
是大抵不可以內者為是而外者為非只得隨理
順應照按不可以內者為是此語有大病與告子杞
柳之喻相似緣只認得因物付物為順不知程子止是
論性須體認子思發而中節一句方有着落何也發而
中節者本乎中也即率性之謂也率性而中節者性善
故也不率於性必至千差百錯

問明道云學者識得仁體實有諸己只要義理栽培一

段朱子曰這道理只熟看久之自見照按必如程子此語方為知性者也何嘗與孟子集義之說有差別

程子體用一原顯微無間二語非深達一貫之旨者不能

程子曰曾點漆雕開已見大意非實有玉尺在手烏能較二子之短長

程子說仁便實去做仁說誠便實去做誠宋儒腳踏實地者止此一人論其造誼與深積力久者相似蓋曾子

之亞也

明道所謂擴然而大公者虛之體也物來而順應者靈之運也

張子

張子西銘是言理一不是言分殊但解分殊中之理一方能一以貫之

張子西銘從論語問禘章與中庸郊社之禮節及禮記萬物本天人本乎祖并哀公問理會出來觀其氣概橫

塞天地與孟子浩然同矣其正蒙諸篇則全從孔子繫辭與說卦理會出來然細觀宋儒之書要唯張子一人之論全是理會易詞而出

分之必殊原不待言即如一人也耳目口鼻顴額輔頤無不同也然終古無兩人相肖者矣聖人之裁成輔相皆是於理一上做工夫子思之位育說歸率性之道孟子之萬物皆備說出誠身之樂皆是懼人徒知分殊而不知理一也

帥字去聲非入聲也即孟子氣帥之帥言為主也

朱子曰天理人欲之分只爭些子故周子只管說幾字然辨之又不可不早故橫渠說豫字

張子天資最高看他將化之與神氣之與虛兩儀之與太極打合一片是何等見識今將正蒙最精者標而出之

張子擇語 散入無形適得吾體聚為有象不失吾常聚亦吾體散亦吾體 有無混一之常 若謂萬象

為太虛中所見之物則物與虛不相資形自形性自性
形性天人不相待而有煦按此謂形器資虛而立實吾
儒之的傳若謂形器為虛則同釋氏之論矣要亦形上
之道形下之器二語見得精耳 氣聚則離明得施而
有形氣不聚則離明不得施而無形煦曰日光附月與
地而始見麗於虛則無由自見是麗於實也 文理之
察非離不相覩也方其形也有以知幽之因方其不形
也有以知明之故煦曰此與周子動靜互根同義 氣

之聚散於太虛猶冰凝釋於水煦曰張子妙於言氣本
形上形下二語來非氣則曷由形乎 由太虛有天之
名由氣化有道之名合虛與氣有性之名合性與知覺
有心之名 神者太虛妙應之目煦之言靈亦猶是也
兩不立則一無可見 造化所成無一物相肖者

一物兩體氣也一故神兩故化 陰陽之精互藏其宅
受者隨材各得施者所應無窮 木金者土之華實
也其性有水火之雜 天體物不遺猶仁體事無不在

煦曰此則參贊位育不難天之知物不以耳目心思
然知之理過於耳目心思聖人盡性不以見聞措其
心其視天下無一物非我有不知則有知無不知則
無知必物之同者已則異矣必物之是者已則非矣
久者一之純大者無之富易一物而三才凡可
狀者皆有也凡有皆象也凡象皆氣也至虛之實
實而不固至靜之動動而不窮

陰陽之義張子所云一物而兩體者是也

西銘不止言體全是言用其必從大原說出是要人不
可遽作分別耳各正性命以後天下之分殊原不待言
張子本意只是由其分之殊推明理之一使知生身之
原胥原於生物之大原而已

煦按知化則善述其事窮神則善繼其志志在事先述
在繼後何謂繼便是繼之者善何謂述便是體仁長人
四句其下承之以君子行此四德句而曰乾元亨利貞
則述可知矣張子本領只是得力於周易遂令人駭其

入理之深

整菴羅氏曰張子正蒙由太極有天之名數語亦是將理氣看作二物其求之不為不深但語涉牽合殆非性命自然之理嘗觀程伯子之言有云上天之載無聲無臭其體則謂之易其理則謂之道其用則謂之神其命於人則謂之性只將數字別撥出來何等明白學者若於此處無所領悟吾恐其終身亂於多說未有歸一之期也照按此四句首二句原不可易即中庸天命之謂

性蓋氣化便是天之大用各正之太和是也其合虛與氣便是言生人所受之性長人之善正在此中只因宋儒有氣質之性一說便將這箇氣字也看壞了豈知性是虛靈的氣只是形體性必附氣而具特不可認氣為性耳至第四句則不能無弊蓋性中未始不含知覺性中却說不得知覺必如孔子貞固足以幹事方是說性中之含蘊繫辭又云天地絪縕萬物化醇方是此時之事便是其體謂之易易之一字便合天地間之大體大

用而兼有之自太極生出至於有形有質之萬物如男
女居室以及聖人參贊位育之妙用非人之有也皆易
之用也烏得專言體乎道也者大用之所在也亦不得
說在裏邊看作所以然

敬軒薛氏曰張子曰一故神即神無方曰兩故化即易
無體照按兩者一之體一者兩之神故曰兩不立則一
無可見

朱子

朱子有希聖希賢之心有博文約禮之學後人但護惜其名而不是正其道理恐非朱子之所樂

朱子之解惟虛靈不昧四字極妙惟無窮盡無方體六字極確其他性道之說不能不間有出入

問心本是箇動物不審未發之前全是寂然靜還是靜中有動意朱子曰不是靜中有動意周子謂靜無而動有不是無以其未形而謂之無非因動而後有以其可見而謂之有耳方其靜時動之理只在伊川謂當中時

耳無聞目無見但見聞之理在始得及動時又只是這
靜底耳此解最粹

敢於背孔而不敢背朱皆見其宮牆而未見其富美者
也

紫陽孔子之功臣也學紫陽而忘孔孟是習其流而未
竟其源樂其外華而未察其內美者也

朱子之學以學為學後儒之學以講為學子曰君子欲
納於言而敏於行

朱子生平得力易不如詩詩不如四子書

朱子集於羣儒既倡之日周子開於一儒未起之先則周子之時勢較朱子為難

有借朱子而指摘陽明者聖人之門貴行不貴言使朱子而居陽明之時不識能逮陽明之事功否

朱子之學亦極博矣而其粹精盡在四書蓋生平之功力獨萃於此故也第於中庸以道字解為路字率字看作行字中和位育必欲分別到底不識於一貫之旨有

合否耶自來論先儒者皆樂道其長而不欲斥其短第
吾儒傳授聖學但當以聖人為師衷諸聖言而止背聖
而宗儒豈學者之自命乎且但取其長而不察其短不
唯非擇欲其精之旨但恐流為道諛之亞耳政恐先聖
先賢未必樂有諛我者也以取功名宗一家言可也以
明聖學則是非斷不可以無辨

漢唐以來擔當聖學無如朱子後儒不唯無學朱子者
并識朱子者亦鮮

陽明詆朱子為楊墨甚矣夫朱子固兢兢乎學孔孟曾
思之正學欲以傳聖人之道以垂教萬世者也第於四
子書中所釋有與四子之旨微有不合者煦於四子書
中已詳辨之矣

程朱

學孔孟者淺深異候要亦各有短長乃於程朱則錄其
長而棄其短或更目所短而亦以為長於陸王則摘其
短而棄其長或更目所長而亦以為短不盡讀古人之

書不深察各家之奧徒信耳以論古人豈持平之論乎
大都自漢以下凡克留心聖學聖道皆孔孟之徒也只
宜以子夏篤信聖人之評評朱程以子張好高務外之
評評陸王庶有似焉要亦不盡然也陸王固狂之流而
參賜之亞也夫人之溺於利祿也甚矣學聖之徒數百
年不一見如盡刻以繩之政恐後人之裹足而不前矣
襲程朱之緒餘而嘵嘵不休匪尚口之可慮抑亦近名
之足羞矣

程朱游夏之徒十哲之配先賢之亞也雖未盡入聖域
亞顏曾一等矣子貢晚年得聞聖道固宜在四配之列



周易函書別集卷十二